

COPPIE DE LA
RESPONCE FAITE PAR
VN POLYTIQUE DE CESTE
Ville de Paris, aux precedens Me-
moires secrets, qu'un sien Amy luy
auoit enuoyés de Bloys, en forme
de Misiue.



Chez Iacques Gregoire Imprimeur.

M. D. LXXXIX.

COPPIE DE LA

RESPONSE FAITE PAR

UN ROYAL DE CEST


VILLE DE PARIS, aux sieurs de M.

meurs de Paris, par un sieur de Paris

meurs de Paris, par un sieur de Paris

meurs de Paris, par un sieur de Paris

dup -
not cataloged



Chapitre de la Ville de Paris

M. D. LXXIX

COPPIE DE LA RESPON-
*ce faite par un Polytrique de ceste ville
 de Paris, aux precedens Memoires se-
 crets, qu'un sien Amy luy auoit enuoyés
 de Bloys, en forme de Missiue.*

MONSIEVR, ie me propo-
 fois qu'après que i'aurois
 assésuré quelques deniers &
 vaisselle d'argent que i'ay
 en ma mai^{son}, ie me mettrois au hazard
 comme les autres de me desguiser en
 quelque sorte, ou en Cordelier ou en
 Musnier, ou autrement, pour sortir de
 ceste ville de Paris, & m'affranchir de
 la perpetuelle apprehension que i'ay,
 & de la Bastille & du Louure (car l'un &
 l'autre seruent auioird'huy de mesme
 terreur.) Mais puis qu'ain^{si} est que ie

vois par tout, nos affaires si desesperez,
 qu'ils semblent nous menasser d'une
 prochaine desconfiture & ruine, ie suis
 contraint de me resoudre de demeurer
 en ceste ville: car ie n'estime plus que le
 séjour d'ailleurs me puisse estre plus as-
 seuré que cestuy-cy. Toutesfois quand
 ie me represente tât de captures, & d'em-
 prisonnemēs qui se font encor iournal-
 lemēt en ceste ville, Ie ne puis que ie ne
 desire la clef, & la liberté des champs.
 Quand ie considere le passé, ie me dis
 à moy mesme, *Belle escappade*. Ie ne dou-
 te pas aussi que vous ne vous esmerveil-
 lies assez comment ie l'ay eschappé si
 belle iusques icy, puis que maintenant
 dedans Paris les emprisonnemens ne
 sont quasi plus que les passetemps &
 esbatemens ordinaires des Parisiens.
 Mais scauez vous le braue moyen dont
 ie me suis seruy pour me cōseruer, & le-
 quel ie pratique encor tous les iours.

C'est que si tost que nous sōmes deux
ou trois ensemble, i'entame le propos
de la mort de Monsieur de Guise. Je re-
cite la liste de ses beaux faicts, Je les lou-
ange iusques au Ciel, Puis, ie cōmēce le
premier à bouche ouuerte de mesdire
du Roy, De detester ses actions, D'ex-
crer sa vie. Et de représenter l'acte der-
nier de Bloys, inhumain, cruel & barba-
re: Accompagnāt le tout de la plus tri-
ste & funeste contenance q̄ ie puis fein-
dre, Et y entrelassant quelques iuremēs
pour mieux cōtrefaire le passionné. A-
pres celà, ie suis réputé le plus hōme de
bien du mōde, Bon Catholique, Biē af-
fectionné, Biē zelé. Et ainsi tous les soirs
i'inuente à par-moy quelque nouvelle
inuectiue pour l'exposer le lendemain
en la meilleure compagnee que ie me
trouue. Or, Ce n'est pas pourtant à dire
que mon cœur aduoüe ce que mes le-
ures proferent, non, non: tant s'en faut,

vous me cognoissez biẽ. Mais ce que i'en fais ce n'est à autre but (comme vous le pouuez croire) que pour sauuer ma vie, à tout le moins pour me sauuer d'une prison, & en consequence d'icelle, de la perte de mes biens, & possible du sac de ma maison, qu'autremẽt ie ne pourrois pas euitier, & en cela ie ne pense nullement lezer ny offẽcer l'integritẽ de ma consciẽce, soit que vous consideriez les Loix ou naturelles ou Ciuiles. Premièrement la nature en nous esleuant, elle cree quant & quant en nous, & vne enuie, & vne libertẽ perpetuelle de nous conseruer en nostre indiuidu. Les Legislateurs aussi gardent pour reigle indubitable, Que par quelque moyẽ que ce soit (sans en excepter vn seul) Il est loisible à vn chacun de sauuer & redimer son sang. Mais possible vous me direz que tous ceux qui entrẽt en prison, ny perdent pas ny leur sang ny leur vie.

Et partant que cecy feroit bon à dire, si en lieu des captures qu'on a faites à Paris, on y eust fait quelque ruerie ou massacre, ce qu'on n'a pas fait. A quoy ie vous respondray d'un seul mot, que pour mon esgard ie ne fais pas grande difference entre la separatiõ de l'ame & du corps, & la separation du corps & des biens: car celuy qui vit, sans iceux meurt toute la vie mil fois le iour, & les autres ne meurent qu'une fois seulement en leur vie. Mais, ie ne delaisse pas au plus profond de mon cœur, de me desmentir de tout ce que j'ay dit, & de maudire le sort, & detester la fortune qui nous maltraicte si impitoyablement, & respand noz mal-heurs si largement par tout. Car si vous avez eü assez de suiet pour faire vn cayer des mauuaises nouvelles de par delà, croyez que quand il faudra faire vn iuste volume de celles de par deça, qu'on y trouuerra suffisant

te matiere. Que si ce n'estoit le deuoir
qui m'oblige, puis que vous auez com-
mencé, & le seruice que ie vous dois qui
me contrainct de vous escrire le pauvre
succes celles de par deça, soyez seur que
ie ne m'embarquerois pas à vous en fai-
re vn triste & mal-agreable discours:
car il me semble que la souuenance des
maux, & la recordation des malheurs
se sont les vrayes abstractions de noz
iours, & racourcissement de nostre vie.

Mais afin que ie me reuanche d'une
partie de la peine que vous auez prinse,
m'escriuant si amplement de toutes nou-
uelles: & de la bõne affliction que vous
y auez apportee, i'emploiray le temps
que ce porteur me voudra permettre,
au recit de ce qui me semblera le plus
important & necessaire pour vous ser-
uir comme d'aduis en la resolution que
vous desirez de prendre en voz affaires,
& pour l'aduenir.

IE m'aduise en premier lieu de vous
laduertir pour fondement de ce dis-
cours, qu'il faut que vous croyez de
deux choses l'une, ou que le Roy est tres
maladuerty de ce qui se trame (ce qui
est peu croyable) ou qu'industrieuse-
ment il cele ce qu'il en sçait pour tenir
toufiours en halaine ceux qu'il a autour
de luy (comme vous le presumiez desla
sagement par voz dernieres.) Vous le
cognoistrez euidemment s'il vous plaist
de conferer ce que le Roy vous promet,
tant de l'impuissance de Monsieur du
Maine, que du peu de courage, Du peu
d'effect, & de l'auarice de Messieurs de
Paris, avec le discours veritable que ie
vous en feray presentement: par lequel
vous verrez que leurs effects sont bien
autres qu'il ne les a predict.

II.

Premierement direz vous que les pa-

risiens ont peu de courage & de resolution, puis que tout le monde depuis le plus grand, iusques au plus petit (capable de la fatigue) se dispose à la guerre, & à remuer les mains avec vne telle allegresse, que le Bourgeois neglige sa famille, & le marchant quitte son trafic, pour faire nombre en ceste guerre, Entre autres, sept ou huiet Marchans de la rue S. Denis, aucuns aagez de cinquante ans, les autres de cinquante-cinq & plus, se sont esquippez de trois & quatre bōs cheuaux, & sont partis avec les autres, la Lance au poing, pour aller au secours d'Orleans, ou en tel autre endroict que on les voudra employer.

III.

D'ailleurs, ou trouuerez vous ce peu d'effect, puis que desia neuf ou dix cornettes de gens-d'armes, & vingt-cinq ou trente enseignes de gens de pied, avec quelques compagnies d'arquebu-

ziers à cheual ~~font~~ forties de Paris il y a long temps.

Où pourrez-vous aussi remarquer l'auarice, puis qu'en la queste & cueillette qui se fit incontînét apres Noel, Il se trouua des Bourgeois qui donnerét volontairement cinq & six cens escuz: les vns pl^s, les autres moins. Les pauures artisans & gens de mestier, donnerent deux & trois escuz (outre la taxe à laquelle ils secottrizerét encore eux mesmes, par chascun moys.) En fin persône ne fût refusant de cōtribuer quelque chose, selon que ses facultez le pouuoit porter: La notable somme de deniers qu'on feit de ladiète cueillette, tesmoigna assez l'amplitude de leurs bourses & l'abondance de leur affection. Mais comment se feroient-ils faict tirer l'oreille, ny pour la cueillette, ny pour la taxe par chacun moys: qu'au contraire

ils s'offrirent encor depuis, à contri-
buer de nouveau, afin que leurs affai-
res ne receussent aucun retardement
par faute d'argent & de solde pour le
soldat.

V.

Quant à ce que le Roy assure de M^o.
sieur du Maine qu'il se contentera de se
maintenir en son gouvernement : Je
crains & sçay bien que les effects de ses
actions nous feront bien tost tenir vn
autre langage. Mais tant s'en faut qu'il
ait iamais eü la conceptiõ si basse: Que
quatre heures apres qu'il eust receu la
nouuelle de la mort de Monsieur de
Guyse son frere (qui fut le lendemain de
Noel, en sortant de S. Iean de Lyon) il
monta à cheual, & protesta hautement
& publiquement en la grande place de
Lyon, Que tât que Dieu luy presteroit
force pour estaindre l'espee qu'il tenoit
nuë au poing, qu'il chercheroit par to^u.

moyés la vengeance de deffunct son frere:
 Et finissant ces mots, il cōiura to' les catholiques par le sang de son frere, respādu pour la querelle de Dieu & la leur, de luy prester main-forte & secours en vne si iuste occasion. Voila dōques defia son intention descouuerte, au cōtraire de l'assurance que le Roy vous veut donner de luy.

VI.

Mais voyons si ceste resolution a esté suiuiue de quelques effects. La verité est que sortant de Lyon, il n'estoit que luy dixhuiet ou vingtiesme: car peu de gēs, de ses Gentilshommes mesmes, estoient aduertis de son partement si soudain, (vray est qu'à vne lieuë delà, il estoit biē autremēt accompagné:) Mais deslors il se remua si a bon esciēt & si diligēment, qu'en quinze iours apres il meit enseble cinq cēs cheuaux, & quatre ou cinq mil harquebuziers: comme ils furent lors

contez luy fortant de Dijon.

VII.

Et depuis ce temps encor, l'on assure
queses forces se sont creuës quasi de la
moitié, & qu'elles se multiplient tous les
iours en marchât, tout ainsi qu'une plo-
te de neige se grossit en la roulant. voyés
donques de combien le Roy se mesco-
te, si ce n'est au péser à tout le moins au
parler: Mais ie crains que ce ne soit en
l'un & en l'autre: car ie sçay que ceux
qui l'ont engaigé au borbier, dont ils
ne le pourront pas tirer, s'estudient to-
talement à luy bâder les yeux: afin qu'il
ne puisse pas plustost prevoir son mal-
heur, que lors seulement qu'il sera tout
à ses piedz, ou plustost abondamment
respandu sur sa teste. Or ie vous ay bien
voulu esclarcir de cecy, touchant mon-
dit Sieur du Maine & les Parisiens, tant
parce que vous en parliez douteusemēt
par vos dernieres, qu'aussi pour vous

prier que d'oresnavant vous armant de la foy de Saint Thomas, que vous ne croyez pas de leger en choses qui vous sont & à nous tous, si importantes: car la difficulté de nos affaires gist en ces deux points, lesquels on nous veut dissimuler pour bastir noz assurances sur des Chimeres.

VIII.

Mais puis que ie suis tombé sur le propos dudit Sieur du Maine, ie vous en diray encor ce que j'en appris l'autre iour, Qu'il a esté receu tres-honorablement à Troye: & q̃ tous les Principaux de la ville luy allerent au deuant avec quelques compaignes de Lâciars & de gēs de pied tous harnachez & accōmodez de deüil. Il y seiourna deux iours avec la meilleure reception de part & d'autre dont ils se peurent aduifer.

L'on m'asseura aussi que depuis qu'il fut sorty de Troye, quelques vnes de

ses troupes auoient deffait trois compaignees de Monsieur de Tinteuille. Si cela estoit, ce no' feroit vn villain coup de baston: Mais parce que le bruit n'en cōtinue pas, Je suis bien aise de n'en rien croire.

IX.

Je suis aduertty ce iourd'huy, q̄ mōdit S^r du Maine est desia à Mōtargis, auquel lieu Messieurs de Paris luy ont enuoyé cēt Cuirasses, Trois cens Lāces, Cinq cēs Mousquets, & quelques autres armes.

Aucuns assurent qu'il vient droit en ceste Ville, où il est extrêmement desiré de tout le monde, & qu'il faict ce pendant aduancer ses forces vers Orleans: Les autres disent qu'il n'abandonnera pas seldites forces pour venir icy, qu'auparauant il n'ait recogneu l'estat auquel sont les affaires dedans & dehors Orleans. Mais quoy qu'il en face, ils se reposent assez sur sa pru-

prudence qu'il fera tout pour leur meilleur. Et ne vous puis dissimuler que ie crains infiniment son approche & encor plus sa venue: car il est plus Lyô que n'estoit deffunct Mōsieur de Guyse son frere. Trouuât donques, soit icy, soit deuant Orleâs, les affaires heureusement acheminez, comme ils y sont. Ie vous laisse à pēser comme il sçaura vser de la fortune & de la prosperité qui luy rit, en vne si belle occasion.

XI.

Ces iours passez ie pensois que Dieu nous eust enuoyé du Ciel, vne consolation & vn reconfort parmy tant de desespoirs, quand i'entendis la menteuse nouuelle de la deffaicte des deux mil hommes de gens de pied que Monsieur d'Aumalle auoit fait partir de ceste ville pour aller deuant Orleans. Et combien qu'au commencement ie le creusse difficilement, tant pour la crainte que

i'auois qu'elle ne fust pas veritable, que
 aussi pour le peu d'apparéce que i'y re-
 marquois. Toutesfois voyant arriuer
 en ceste ville tant de soldats desconfits,
 qui ne parloient que de leur deffaicte,
 & de la braue sorte dont ils s'estoient
 eschappez, le le tins en fin pour indubie-
 table. Et sur cela r'appellant à moy la
 ioye & l'allegresse que i'auois banie de
 mon cœur, l'en redis vn bon coup & de
 bō cœur, graces à Dieu; Mais ceste ioye
 fust bien tost rabbatue par les contre-
 nouuelles qu'on receut deux ou trois
 heures apres, que non seulemēt c'estoit
 vn faux bruiet que quelques vaillās sol-
 dats, du creu de l'Isle de Frâce semoient,
 pour couvrir leur couarde & honteuse
 fuitte; Mais au contraire que les quatre
 cens lanciers que Monsieur d'Aumalle
 auoit enuoyé quant & quant lesdictes
 compagnies estoient entrez dedans
 Orleans.

Et ie vous diray, au raport de ceux qui en parlent le plus asseurement, comment la chose se passa, encor que le discours en soit vn peu plaisant & mal-cōuenable au deüil q̄ nous deuons auoir empraint & grauédedans le cœur: Mais encor faut-il quelque fois monstrier bõ visage à l'aduerse fortune.

Monsieur d'Aumale, nonobstāt toutes les importunitiez & instāces que luy ayent sceu faire & les Parisiēs & les enuoyez d'Orleans pour faire promptement sortir quelque secours de Paris, & l'enuoyer auxasiegez: vsant d'vne grādissime sagesse, ne l'a iamais voulu faire, ny entreprendre, qu'il n'ait veu le secours qu'il auoit pour y enuoyer, assez fort pour resister à vn besoin aux forces que le Roy tenoit deuant Orleans: preuoyāt l'incōmodité que ie croy, qui en fust arriuee s'il eust hazardé indiscret-

tement des soldats de Paris & des enuiron sans autre saufconduitte & assurance.

XII.

Ayant donques enuiron le vingtiesme ou vingt & vniesme de ce moys, par le moyen des commissions qu'il auoit dōnées deux mil harquebuziers & quatre cens Láciers, il les fit partir pour s'acheminier vers Orleans. Or s'estás desia aduancez iusques aux fauxbourgs de Nemours, Monsieur de Congy qui cōduisoit les deux mil harquebuziers, eust aduertissemēt que quelques six ou sept vingts Lances & trois cens, tant Suisses qu'harquebuziers du Roy, venoient à eux, ou pour les charger, ou pour les recognoistre. Quelques soldats experimētez en l'Arithmetique ouyrent le vêt de cest aduertissement, lesquels tout quāt & quāt multiplierent les vingts par certaines, & les centaines par milliers, & firent voiler d'une mesme diligēce le bruit,

Que le Roy enuoyoit six cens cheuaux,
deux mil harquebuziers, & quatre cens
Suiffes pour les tailler en pieces, Le
bruiet (encor qu'il porta son assurance
quant & luy, pour le peu d'apparence
qu'il y auoit au nōbre qu'ils adioustoiēt
donna toutes fois la larme à l'œil, & l'a-
larne au cœur, aux soldats qui auoient
les dents plus longues que la barbe, si
chaude & violente, qu'ils regarderēt &
tascherent tout à l'heure de recognoi-
stre & fleurer le chemin, par lequel ils
estoiēt venus à ceste buscherie: Et sur
cela ayant aperceu les fufdites six vingts
Lancés qui venoient, plusi oft pour les
recolnoistre que pour les cōbatre, ils
se vont donner l'espouuente si grande
qu'il ne fut iamais possible de les affeu-
rer, & encor moins de les retenir: car ils
auoiēt ramassé tout leur courage, pour
voir à qui ccurroit le mieux. Ainsi quel-
ques deux cens reprindrent les brisees

de Paris à grandes iournees, s'escartans
 & s'esparpillans, mais ie pense qu'il y a
 quelque autre mot, les vns de ça, les au-
 tres de là, selon que la bôté de leurs nez
 les reconduisoit par les mesmes traces
 qu'ils estoient venus. XIII.

Or cela donna occasion & en uie aux
 six vingts Lanciers, & aux trois cés har-
 quebuziers du Roy de venir faire vne
 charge sur ceux qui estoient demeurez.
 Ce qu'ils feirent, figurans possible en
 leurs cœurs le mesme merite qu'aux au-
 tres: Voyans ausi que les quatre cens
 Lances n'estoiet pas là pour les souste-
 nir si promptement: Maistant s'en faut
 que ceux-cy suiuisset les airres de leurs
 compagnons, qu'ils se monstrent ausi
 resolu que les autres mal asseurez &
 couards. De sorte que non seulement
 ils soustindrent les assaillās, Mais encor
 ils les repoufferent si rudemēt qu'ils les
 recōduisirent à vn quart de lieue: si biē

qu'il ne leur restât aucun empeschement,
qu'ils n'entraissent eux & leurs quatre
cens Lances aisément dedans Orleans.

XLIX.

i. Voila le discours comme il se con-
te par ceux mesme qui l'ont professé
& de la vérité, & de l'histoire. Est
toutesfois, ie m'en persuade bien autre
chose, & croy fas doute qu'il y auyt en
ladite charge beaucoup plus grand hom-
bre, & de Lancers & de gens de pied du
Roy, qu'on ne dit. Mais que Monsieur
d'Aumale par vne subtile ruse, & artifi-
ce de guerre, lauoit commandé à Mon-
sieur de Congy qui l'presenta à l'enne-
my occasion aduantageuse en apparen-
ce, d'attaquer son infanterie: afin que,
ce pendat que l'enemy se seruiroit de
cette occasion & qu'ils s'entrechoque-
roient, la cavallerie (de laquelle specia-
lement Messieurs d'Orleans auoiet af-
faire) se peust couler fas perte ny hazard
dedans Orleans: comme de fait il arri-

ua que les quatre cens Lanciers y entrerent, ayans les flâcs tournez vers le dos de leur infanterie, & à couuert d'elle.

XV.

Le lendemain qu'elles furent arriuees dedans Orleans, ceux de la ville feirent sauter par artifices de feux & de poudre vne Tour de la Citadelle sur ceux qui estoient dedans pour la defendre: (car l'on faisoit contenance de la vouloir auoir par dehors & par assault.) Toutesfois l'artifice ne fait pas si bien son effect, q̃ quelques soldats n'eschappassent des ruines de ladite Tour, Mais ils ne peurent pas apres eschapper là leur propre: car se voulâs s'allier & mettre en deffence contre ceux de la ville, qui se presentoient pour y entrer, ils furent tous taillez en pieces, pour la trop grande inegalité d'eux à leurs ennemis. Cela fait les habitans entrerent dedans ladite Tour fort aisemēt & sans plus

plus de resistãce ou ils trouuerent grãd
quantité d'armes qu'ils prindrēt & por-
terent en leur hostel de ville.

XVI.

Le iour ensuyuant, ils feirent vne for-
tie de cinquante cuirasses seulemēt, les-
quelles donnerent iusques aux enuirōs,
& quasi aux portes de Bloys, ou trou-
uant dix ou douze Archers du Roy, ils
les prindrent & emmenerent liez & ga-
rottez dedans leur ville. Ces deux ex-
ploits les rendirent si fiers, qu'ils man-
derēt tout à l'heure mesme à Messieurs
de Paris, confirmāt tousiours leurs let-
tres precedentes qu'ils s'asseurassent, &
de leur resolutiō, & de leur courage, &
que tant s'en faut qu'ils ayent iamais
pensé de se rendre pour vne poignée
d'hommes qui estoit deuant leur ville,
qu'au contraire ils estoient tout dispo-
sez & resolus de soustenir vn camp de
trente, voire de quarante mil hommes

s'il se presentoit , au parauāt qu'ils vou-
lussent seulement entamer vn propos
de composition, & moins encores de re-
dition comme on leur auoit voulu im-
poser.

XVII.

Et cōbien que ces nouuelles me soiēt
assez nouuelles & fascheuses . Toutes-
fois i'en ay receu d'autres par lettres de
Monsieur de Iardu mon beau-frere, qui
est deuant Orleans, lesquelles me mar-
tellent beaucoup d'auantage . Je vous
raporteray briefuemēt quatre ou cinq
chefs quelles contiennent.

Le I. Que ceux d'Orleans se soucient
si peu d'eux, qui sont deuant la ville, que
ils fōt tous les iours à leur veüe, des sor-
ties de dix, douze, & quinze cuirasses
seulement, sans qu'ils ayent, ny le moyē,
ny possible le courage (car ils ne reçoï-
uent point d'argent) de les empescher.
Le deuziesme chef, Que ceux de dedās

leur rescriuent quelquefois par gosse-
rie des lettres, comme à leurs bōs amis,
disans qu'ils se peuuent bien asseurer, au
nombre qu'ils sont, que iamais ils ne re-
ceuront aucun desplaisir de leur part:
Car (disent-ils) leur victoire n'auroit
point de louange ny d'honneur: Signi-
fians par là, qu'ils les estiment indignes
de leur colere.

Le troisieme, Que depuis q̄ le bruit
de Monsieur du Maine leur a soufflé aux
oreilles, Ils ont perdu la sixiesme partie
de leurs soldats: parce qu'ordinairement
quand ils en mettent cinquante ou soi-
xante en embuscade: quatre ou cinq heu-
res apres, à tout le moins le lendemain,
il n'en reste pas la moitié, quelques fois
pas le quart, qu'ils ne soient tous entrez
dedans la ville: En fin le plus souuent il
ne s'en faut que ceux ausquels on a re-
fusé les portes, & qui n'ont pas peu en-
trer dedans pour n'estre d'assez belle

deffaite: lesquels, ceux de la ville remerciēt (par gofferie) difans, qu'ils n'en peuvent pas heberger d'auantage pour vn coup, & qu'ils les prient de les excuser iufques à vne autre fois.

Le quatriefme, Que pour acheuer la moquerie qu'ils veulent former, ils fōt fortir des viures de dedans leur ville, lesquels ils vendent aux affiegeans, & leur difent qu'ils leur ont beaucoup d'obligation: car eftans caufe qu'ils exercent les œuures de charité, ils font par confequent les instrumens, au moyen defquels ils gagnēt le Royaume des cieux. Voulās dire qu'ils recoiuet, Les vns dedans leur ville, craignans qu'ils ne meurent de froid deuant leurs portes. Aux autres, qu'ils fōt administrer des viures de peur qu'ils n'y enragent de faim. Ce qui leur feroit (difent-ils en fe moquās) vn trop grand reproche deuant Dieu.

Le cinquiefme, Que leur fiege fait cō-

te de descamper aussi tost qu'il sçaura
que monsieur du Maine sera proche: &
qu'il n'y demeurera pas vn seul homme
pour tenir la campagne.

Le sixiesme & dernier chef, Que lors
le Roy se trouuera bien empesché pour
se sauuer luy mesme: Et ce pendant que
les prisonniers pourront bien auoir du
bõ: car le Roy aduîsera plustost à sa sau-
uegarde qu'à leur serieuse & soigneuse
garde. voila sommairement ce que cõ-
tiennet les lettres dudict Sieur de Iardu,
lesquelles (afin que ie ne vous mente) ie
trouue soustenuës de tres-grandes ap-
parèces, & de raisons biẽ vrgentes: C'est
cela aussi qui m'a donné occasion de les
vous rapporter icy: Afin que vous y ad-
ioustiez tant & si peu de creance qu'il
vous plaira.

XVIII.

Ie ne vous sçauois dire ny exprimer:
combiẽ de fois ie me suis despitẽ & des-

pleu en moy-mesme, (comme encor ie fais, quand i'y pèse) du refus que le Roy fait aux deputez d'Orleans, qui estoient venus vers luy, aussi tost qu'ils sceurent la nouuelle de Monsieur de Guyse, pour luy mettre leur ville sous son obeissance: Pourueu qu'il leur voulut passer les deux conditions que vous scauez, L'une qu'ils auroient vn autre Gouverneur que Monsieur d'Antragues, L'autre que leur Citadelle seroit razeë, Ce que le Roy non seulement ne leur voulut pas accorder: Mais encor il les menassa tres-aigrement & seuerement, à la tres-pernicieuse persuation de quelque Troubleur De, lequel pensoit indubitablement & en plain iour pescher des Daulphins, mais ie croy qu'encor sur le soir il se contentera bien de simples Saulmons.

XIX.

En fin ie trouue que ce refus seruit de planche assuree à nostre malheur, pour

faire son approche sur nous.

Premierement il fut cause que Monsieur le Cheualier d'Aumalle fut non seulement admis dedans Orleans: mais tresbien receu & accueilly de tout le peuple: Car il leur venoit comme vn recort assure, sur vn commencement de desespoir (auquel la responce du Roy les auoit contrainsts & quasi precipitez) & de fait si tost qu'il y fut entre, il leur remeit le cœur au ventre & l'assurance au cœur. Il distilla & alabiqua sur leurs estommachs refroidis, quelque peu, du trop de hardiesse, & haut courage qu'il a en luy, si bien que la guerison de leur estonnement & inassurances en ensuiuit promptement. La valeur laquelle leur a depuis esté plus que iamais domestique & familiere nous en a assez, & trop pour nous, donné de tesmoignage par ses effects. XX.

De ce malheur s'en sont ensuiuis d'au-

tres plus importans , en consequence toutesfois du premier : C'est qu'Orléas s'estât ainfi rebellé & ayant enuoyé par toutes les villes vne declaratiõ de sa volonté & resolution : alors elles se mirent & comporterēt toutes à son exemple , sçachant assez l'importance de la ville , & le moyen qu'elle auoit de leur nuire, ou de les endõmager en cas qu'elles ne se resoudissent à courir la mesme risque qu'elle faisoit.

XXI.

De là est venuë l'assurance de Paris (le comble de nostre malheur) laquelle estoit au commencement composee assez bijarrement , d'humeurs tiedes & froides: Dõt on tiroit vne presumption tres-grande , que sa manutention en tel estat ne dureroit pas long temps: n'eust esté la reciprocité de correspondãce & d'intelligence qui interuint du depuis entre elle & Orléas. Tout cela à creu le
cœur,

cœur, appresté le courage, & renforce la hardiesse des subiects, mutins, & ennemis du Roy.

XXII.

Que si au cōtraire le Roy eust accordé à ceux d'Orléans ce qu'ils demandoient (seruant plustost à ses affaires, que s'accommodant à leur demande) ils se fussent maintenus sous son obeissance, & par consequent ils eussent tenus, & retenus en bride toutes les autres villes, pour se contenir sous la mesme subiection: Et la mesme crainte qu'elles auoient d'Orléans (laquelle les auoit espointonnées à se rebeller contre le Roy) les eust contrainct de se déclarer pour son seruice, & m'asseure que Paris mesme, eust songé deux fois à la resolution eust prise.

XXIII.

Mais en tous cas, le Roy n'eust-il pas tousiours bien & commodement prins

la raison d'une forfaiture & requeste si impudète & desobeissante? Trop trop, Quand il se fust veu le plus fort sans contredit. Il y alloit d'une simple dissimulation, Parler de paix en la bouche, & laisser le sag en depost sur le cœur, iusques à ce q̄ quelque occasiō chose eust apporté la saison propre de s'en descharger l'estomach, & de vomir le fiel qui y eust couué. XXIII.

Je croy bien sans doute que le Roy n'est pas à s'en repentir: mais (helas) cela ne nous garétit pas des malheurs qui sont trop prodigusement respandus sur noz fortunes, Que s'il eust seulement entheriné l'une des demandes de ceux d'Orléans, le croy fermement qu'il fust orléans, & non pas en la peine, ny en la plaine cōme il est: car il ne luy reste pas en tout son Royaume vne seule ville d'asseurace, pour luy servir d'Azil & de refuge inuiolable.

Mais pour me recueillir sur tout cè
que ie vous ay discouru iusques icy, &
vous en dire mon aduis, iugemēt, & ar-
rēt, aussi franchement & rondement
que vous m'en auez donné l'exemple,
& la leçon par vos lettres. Je vous affeu-
re, Si le Roy est disgratié deuāt Orleās,
Que i'estime que ce rebutement luy
importera de toute sa fortune, voire
luy apportera vne consequence neces-
saire, q̄ tout ce qui en dependra, pren-
dra la mesme desfoute: suyuant le vieil
Prouerbe, *La premiere pince vaut la
pinte*. Que si vous me demandez main-
tenant qu'elle opinion i'ay dudit Sie-
ge, Je vous diray à mon regret, que les
presumptiōs que ie vous ay recité, sont
en mon endroit si violentes, qu'en con-
sequence d'icelles, ie tiēs ja le cāp pour
leuē, Le Roy par ce moyen desnüé de
toutes ses forces, Son royaume tresper-

du pour luy, luy-mesme tout rsepandu
à ruine: sans qu'il me reste aucune espe-
rance de reſtabliſſement pour l'adue-
nir. **XXVI.**

Mais ie ſuis contēt de dōner mois de
foy à ces preſumptiōs & conſequēces:
Ie vous veux monſtrer (encor q̄ le cœur
m'en fende) par raiſons plus viues, qu'il
luy eſt impoſſible, ny de ſe remettre iā-
mais ſus, ny ſeulement de ſereconcilier à
ſon bon-heur & proſperité paſſee: Car

Si lors, que la fortune eſtoit encor
driocte pour ſe pouuoir verſer auſſi biē
de ſon coſté que de l'autre,

il a eũ tant de peine à faire vn meſ-
chant corps d'armée, qu'il a fallu qu'il
l'ait rapsodié & médié de mil endroits,

Maintenant que la fortune ſ'eſt du
tout declarée contre luy: Quelle atten-
te en auez vous?

XXVII.

Si lors, que la fortune ſe bloit l'auoir

mis au dessus de ses entreprises,
 il n'a peu ny tous les Capitaines qu'il
 y employoit leuer en tous ses pais vne
 seule compagnee,

Maintenant que la fortune est pan-
 chee & toute courbee sur son malheur;
 qu'en pouuez vous esperer?

XXVIII.

Si lors, que la fortune sembloit l'a-
 uoir leué sur le Theatre de conqueste,

il a trouué que les Commissiōs qu'il
 decernoit pour conquester des hōmes,
 ne seruoient que de risée & n'auoiēt au-
 tre vertu que de faire enroller sept ou
 huit belillres, qu'encores les commu-
 nes vouloient massacrer,

Maintenant que la fortune semble e-
 stre obligee à sa ruine certaine & gene-
 rale: qu'elles forces pensez vous qu'il
 fera?

XXIX.

Si lors, que la fortune l'auoit fait triō-
 pher de ses ennemis les plus iurez,

il a rencontré tous ses subieſts eſgui-
ſez & appointez cōtre luy, diſans qu'ils
ne marcheroiēt iamais ny ſoubs ſes dra-
peaux, ny pour luy, Pour paſſer ſur le
ventre à leur Religion,

maintenāt que la fortune triomphe
de ſon malheur: Quelle obeiſſance pen-
ſez vous qu'il en tirera.

XXX.

Si lors, que la fortune l'auoit rendu
plus à craindre, & effroyable, que feu,
foudre & tonnerre.

il a trouué toutes ſes villes, citadelles,
& chasteaux bandez contre ſes efforts,

Maintenant que la fortune ſemble
pluſtoſt auoir irreuocablement iuré ſa
teſte à tout le monde, que l'auoir ſim-
plement promiſe à quelqu'un: Quelle
part trouuera-il ſon aſſurance?

Comment fera-il pour euitier

La terreur, La ruine, Le ſac, Le fer & Le ſang qui
Le regardē, Le cōduit, Le ſuit, Le talōne, Le menaſſe

Et qui ont deſia barre ſur lui ineuitable.

Mais las ! nos malheurs me faisoient
 le cœur, le me meurs, si ie n'adresse ce
 discours à quelque subiect plus doux.
 C'est la peur (non pas ma main) escap-
 pée au desespoir, qui a conduit ma plu-
 me iusques icy.

XXXI.

Ie reuiens maintenant à Monsieur
 d'Aumalle & à nos Parisiens, lesquels
 n'ont pas les nerfs moins bandez pour
 apporter quelque chose & de leur in-
 dustrie & de leurs effets à la cause qu'ils
 appellent commune, que ceux dont ie
 vous viens de parler.

La compagnee de deux cens Lances
 que Monsieur d'Aumalle leue dedans
 Paris, pour faire ou des courses aux
 enuiron, ou empescher celles qu'on y
 pourroit faire, en dōne vn assez ample
 tesmoignage, Et n'estime rien moins,
 Qu'encores que la fortune nous vou-
 lut monstrier meilleur visage que nous

n'esperons, Sinon que lesdictes Lances romproiēt le col à toutes les entreprin-
ses que nous pourrions faire sur eux.
Car elles feront tousiours sus-pied, &
prestes pour voltiger en la cāpagne en
cas de quelque descouuerture.

XXXII.

La resolution que Monsieur d'Aumalle & Messieurs de Paris ont prise, me semble encor plus importāte & prejudiciable au restablissement de nos affaires: Car ils ont arresté & cōclu de faire en vn mois, la despence qu'ils se proposoient au commencement de faire en sept ou huit: pour aduācer par le moyē de cest aduancé leurs affaires dedans le dict mois, autant & plus qu'ils feroient en vn an entier, s'ils continuoient leurs pointes plus froidement.

XXXIII.

A ceste fin, ils font vn fonds de deux à trois cens mil escus, pour non seulement